

欽定剿平粵匪方略

欽定勦平粵匪方略卷二百四十六 庚申年

七月初一日

癸巳

張芾奏言賊由廣德涇縣同時

內犯徽防三面戒嚴臣於五月十七日飭道員

蘇式敬副將王夢麟余永椿等分路進攻詎該

逆大股撲犯分界山復向旌德東西兩路縱火

大掠經蘇式敬等分投抄擊疊有斬擒適王夢

麟等潛襲廟首斬馘奪旗聲勢頗壯蘇式敬聞

西路獲勝乘勢揮軍蕩擊先將分界山及旌東  
之賊驅出烏嶺二十九日各隊疾趨而進立焚  
廟首賊卡逆衆盡向三溪而逸方我軍之會攻  
孫村廟首也余永椿督率參將袁國祥等力攻  
甘棠再戰再捷斬獲甚多賊復竄廟首延及孫  
村蘇式敬王夢麟乘賊喘息未定派兵直前迎  
擊擒賊目鍾喻嘩外委楊光德等亦各手刃悍

賊殲斃殆以百計賊始越博嶺遁走維時涇縣  
已成賊藪由烏嶺三溪博嶺而往者愈聚愈多  
統計不下八九萬衆分股徧伺甯郡蕪湖羣醜  
亦傾巢而來將爲四面攻圍之計自六月初一  
日起擾高嶺竄竹塘兩犯團山九次環撲東西  
南各門又糾塘溝金柱關賊船水陸並進周天  
受登陴守禦慷慨誓師繕修附郭營壘號召團

山勇練兵民感泣荷戈而前十餘日中一日數  
戰雖屢挫兇鋒焚燬賊壘無如甯防糧餉久虛  
鉛藥不繼飢卒以轉戰而益憊賊黨以裹脅而  
愈多累卵之危朝不保夕臣每接周天受來書  
悲楚激越未嘗不思籌兵往援速解城圍然欲  
援甯郡非有勁旅數千不能得力現值太平之  
三折嶺等處遊氛莫定旌德邊境如蠶嶺窄溪

朱旺村一帶尙有逆蹤分飭余永椿王夢麟等扼紮旌太諸嶺兵力尙形不足實苦於無隊可抽幸江長貴在廣德防兵內酌派二千數百人交米興朝統帶赴甯曾國藩亦因未能濟師撥助餉銀益以軍火遴弁繞道解往所望援師早到一日卽蘇甯郡一日之困宜興一股已竄於潛昌化地方偏近歙東雖派同知梁泰亨等率

勇往堵昱嶺關並調蘇式敬帶親軍來郡以備  
緩急乃諜聞此股賊衆復由於潛延擾臨安界  
內儻不卽日掃除則節節牽掣終貽浙皖之憂  
臣惟有竭此心力督飭將弁籌攻涇縣藉紓甯  
警仍兼堵東南邊壤以杜竄越

同日周天受奏言五月二十八日僞輔王楊逆  
分黨二萬有餘竄近甯郡東南而蕪繁涇壩等

處踞匪亦因而蠢動外防不能輕撤外援不能  
驟來激勵拊循誓守此土復諄商署皖南道福  
咸督飭官紳協力繕守並派候選知府蕭文斌  
督同隨營文員晝夜巡緝部署甫定六月初一  
日東南兩路之賊已距城二三里依山列陣臣  
登陴固守遊騎來犯輒礮斃之並派隊下城攻  
勦逆鋒稍斂東路東溪橋騎賊突至亦擊敗之



是日西路又增賊黨於是東西南三面賊壘環列初二日賊攻西門營盤初三日賊犯南門官軍分路迎戰均有斬擒而灣黃之賊復糾合蕪逆進犯郡北之竹塘參將朱景山敗之於豹山頭賊乃遁去初四初五等日南路東路西路之賊更番攻撲復經官兵殲斃多名初六日西南兩路賊衆分隊直犯西門城礮連轟伏軍自營

後縱擊賊驚愕而奔擒斬僞將軍李逆一名遊  
擊曾得勝揮軍攻南路賊營亦獲小勝甫欲收  
隊東路賊匪突至教場向元吉部勇迎戰擊斃  
數賊臣派親軍下城助戰賊不得逞中路官軍  
乘勝掩追左右兩路伏兵繞過賊前賊奪路狂  
奔槍斃騎賊甚衆陣斬僞先鋒施逆一名連日  
賊隊漸引而北欲以合圍困我臣派兵出城騷

勦賊堅匿不出初十日黎明天大霧雨三路之賊悉衆來犯臣登城嚴守賊以溼絮夾竹爲牌滾近壕邊勢將攀牆而上營中火器與城上火礮對準環轟賊隊始不敢進策應之軍皆冒雨橫矛往來蕩擊該逆漸怯乃縱軍衝殺斬僞檢點一名殪賊不可勝計將西南兩路之賊逼退因雨未息收隊其東路之賊尤悍經防軍盡力

勦擊殺傷以數百計始遁歸賊巢十三日官軍  
進攻南路之賊連破二壘斬馘數十生擒十二  
名自初一日賊徧城下以至今日將士踴躍用  
命官吏紳民竭力守禦屢危而安誠非臣意料  
所及現准張芾來函知督臣曾國藩師次祁門  
已飛咨分軍援甯提臣江長貴來函亦允派軍  
援救惟甯郡與徽州廣德道路多梗援師能否

速來殊難遙測惟有就現在兵勇相機堵剿以  
待外援伏祈

皇上飭令曾國藩速蒞甯郡俾臣得以秉受機宜合軍  
掃蕩均奏入

上命軍機大臣傳諭張芾周天受曰旌太等縣賊匪糾  
合大股圍撲甯國府城周天受登陴守禦自六月初  
一至十三等日疊次出戰均有斬獲而賊勢仍不稍

卻甯郡爲江南上游地勢最關緊要江長貴於廣德  
防內派撥之援兵二千數百名計亦不久可到著周  
天受一面嬰城固守一面激勵士卒先就現有兵力  
會合江長貴所派之兵四面夾擊並著張芾派撥得  
力兵勇前往救援以期迅解城圍毋致稍有疏失其  
宜興股匪已竄於潛昌化偏近歙東並著張芾派撥  
將弁督兵實力堵剿毋令蔓延爲患

上又命軍機大臣傳諭曾國藩曰賊匪兩萬餘人分路竄撲甯國府城周天受派撥官軍分投迎擊屢次鏖戰賊勢不衰現在府城被圍情形危急甯國爲江浙屏蔽儻有疏失則無湖等處之賊得與蘇常聯絡勦辦愈難著手曾國藩已抵祁門著卽調派勁旅間道前往甯國與周天受內外夾擊藉解城圍並責成領兵將弁星速遄行毋稍遲誤其蘇常等屬應如何速

籌進剿一俟鮑超等到營並著卽行籌辦

周天受又奏言臣胞弟參將周天孚經臣派守金壇縣城五月初一日接到周天孚差齎密稟據稱金壇自四月初一日起悍賊力撲縣城經蕭知音等與天孚會同官紳督率民團嬰城固守情形萬分危急當將原稟咨送張芾轉咨張玉良酌量辦理查金壇縣介常州丹陽溧陽句



容之閒此時鄰境皆賊逆壘百數圍偏縣城以  
彈丸之區孤懸於四面皆賊之地將士紳民效  
死勿去爲

國家守此尺土而被圍四月並無一旅之援應如  
何籌軍援勦解其倒懸伏祈

飭下江南督師大臣迅籌辦理奏入

上命軍機大臣傳諭巴棟阿曰金壇縣城以彈丸之地

界連常州等處四面皆賊該文武將士紳民深知大義堅守待援至數月之久效死勿去必得迅速援救俾忠義自效者得以保全方可激勵軍民之心前據薛煥奏稱已咨商總兵馮子材派兵前往現在該總兵是否業已派兵往援著巴棟阿迅卽添派得力勁旅兼程援救力解城圍毋得以兵單力薄坐視不救張芾又奏言查廣德爲浙皖關鍵逆匪自湖州

敗竄而來本圖竊踞要隘以絕皖浙聲援旋聞  
江長貴米興朝各帶兵勇由武康孝豐兩路進  
取聲勢甚壯賊卽驚亂先期遁向甯郡一帶追  
官軍馳至卽於五月十一日將州城收復現在  
江長貴仍在該州督兵駐守奏入報

閱

初三日

乙未

官文胡林翼奏言准都興阿恭錄

諭旨催調兵勇臣等查湖北征皖各軍多隆阿舒保分  
爲兩路每營馬隊不過千名其中尙有不得力  
者除已撥給都興阿二百九十餘名外爲數無  
多外謀皖境內顧楚疆實屬不敷策應何能再  
行抽撥至湖北步軍均係湖南勇丁勇與兵異  
非自行招募則將與勇不習難期得力且皖北  
楚軍除蕭啟江六千人派援四川不計外蕭翰

慶之援浙曾國藩之謀吳分去一萬六千餘人  
兵勇分布實形不足臣胡林翼派員回南招募  
新勇總須八九月後乃能到防安慶桐城潛山  
英山霍山等處兵力實虞單弱其漢陽黃州德  
安三府尤屬空虛現據各路探報賊首偽輔王  
楊逆率大股四萬餘人循南岸而上意在過江  
抄我兵之後賊目偽寶天義偽則天義偽秉天

安等率衆二萬餘人已至和州四眼狗陳玉城  
已至廬江該逆等妻孥畜產盡在安慶城中勢  
將剋日分股來援是楚北皖北之情形萬分危  
迫且據蜀中探報首逆石達開現已由粵西竄  
黔省攻陷廣順州城將謀五路犯蜀四川滇匪  
尙肆何堪再有石逆之擾萬一川省有警則湖  
北居其下游荆宜一帶尤須防守此湖北馬步

兵勇萬難分撥之實在情形也都與阿雖體疾  
尚未全愈而帶兵多年誠如

聖諭該將軍久歷戎行曉暢兵機正可借資調度不必  
衝鋒陷陣親臨前敵該將軍自應遵

旨馳赴揚州督辦堵剿聞揚郡舊有馬隊約千人都興  
阿到後即可奏明歸該將軍統帶是馬隊一項  
不慮乏人調遣而李若珠所帶步隊各營亦盡

歸其節制堵剿均可兼資如必欲攜帶步隊前往或由該將軍自行委員招募一二千人以資調度奏入

上諭曰近又有寄諭仍飭籌撥官文等自應懍遵該將軍雖不甚習於步隊已有旨飭令另派大員隨同都興阿管帶矣

同日王有齡奏言逆匪自竄入於潛後旋東竄



貴芳橋離臨安約四十里而地風山牧亭村等處均有賊蹤逼近分水水道亦可直達桐江其大股仍在於潛盤踞臣屢接探報均稱四眼狗陳逆由蘇紆黨五六萬意欲竄擾杭湖以解嘉興之圍又思先取徽甯等語查於潛地方東可達臨安餘杭南可達新城分水桐廬均可內犯省城若賊占踞嚴州則江西福建數省之餉道

不通援兵隔絕杭垣亦爲之坐困現在雖調蘇  
鏡蓉一軍由武康折赴餘杭並令副將周萬遠  
督帶所部千餘人由衢來嚴兼派錢江礮船上  
駛嚴州桐廬等處然兵力過單不足以當大敵  
彭斯舉一軍向稱敢戰近在孝豐遇賊退至昌  
化分水軍士器械亡失過半已不足恃省城兵  
勇雖有一萬數千人勁旅固屬無幾且城外營

盤均已紮定一經抽調布置卽不能周萬一該  
逆乘虛內犯防勦必致兩失臣與瑞昌來存再  
四籌維實無萬全之道因思曾國藩已抵東流  
若一徑入徽卽由淳安嚴州轉戰而東先將此  
股逆匪勦滅則皖浙俱可保全而以次削平江  
蘇諸郡縣亦不難矣相應請

旨飭下曾國藩迅速前來以挽危局奏入

上命軍機大臣傳諭曾國藩曰前諭曾國藩俟左宗棠  
李元度鮑超張運蘭等到齊分道進兵規復蘇常茲  
據王有齡奏逆匪盤踞於潛東可達臨安餘杭南可  
達新城分水桐廬均可內犯省城若占踞嚴州則江  
西福建餉道不通援兵隔絕杭城亦爲坐困省城兵  
勇雖有一萬數千能守而不能戰該撫接據探報並  
盤獲奸細有四眼狗陳逆由蘇糾合賊黨欲竄杭湖

以解嘉興之圍又思先取徽甯之語省城萬分危急  
曾國藩現抵祁門若由此入徽卽由淳安嚴州轉戰  
而東先將此股逆匪勦除則皖浙可以保全然後進  
兵削平江蘇諸郡縣庶大局可以挽回如曾國藩尙  
未能督兵前往卽著催調張運蘭鮑超等迅速到齊  
兼程前進以顧全局

王有齡又奏言查張玉良督隊進攻嘉興雖堅

城未能立下實能以勦爲防北路無虞內犯惟  
宜興一路緊偪長興本月初閒賊自宜興竄入  
長興縣境恐其乘虛徑撲湖州趙景賢聞信折  
回僅有千餘名兵勇留守平望蘇州之賊遂分  
大股來撲兵勇退守震澤鎮地方臣等派遣員  
彭斯舉進勦長興知縣蘇鏡蓉往防武康而賊  
已於初六日由長興竄入安吉且至距獨松關

二十里之遞鋪焚掠臣令彭斯舉折赴獨松關  
乃行抵孝豐遇賊失利已退往昌化賊卽跟蹤  
追至於潛縣離省不及二百里臨安餘杭處處  
空虛臣又調蘇鏡蓉之勇折回餘杭相機迎剿  
浙省兵勇二千人大半能守而不能戰今西路  
賊氛密邇省城布置尤宜加嚴非甘於株守也  
竊謂蘇省賊勢蔓延由浙進兵必須三路一從

嘉興一從長興一從廣德方免後顧之憂即使  
瑞昌統軍出省亦僅能督同張玉良專辦嘉興  
一路此外獨當一面者實難其人曾國藩初有  
三路進兵之說其時賊燄方熾杭省岌岌可危  
不能不力保廣信衢州以爲退步現在杭省情  
形又與前不同所派李元度等防守衢廣之師  
似應移緩就急飭令迅速前來隨同勦辦如該



聞

署督能卽由徽入浙從長興進攻宜興一面分  
兵會合江長貴由廣德進攻溧陽張玉良再由  
嘉興三路合剿蘇常不難得手再行聯絡徽甯  
各軍直擣蕪湖以取建瓴之勢大局轉機實在  
乎此奏入報

初五日  
丁酉前內閣學士龐鍾璐奏言江南大營

潰散何桂清棄常州而走半月之間常州無錫  
江陰崑山太倉相繼失守常昭三面皆賊逃兵  
敗勇紛紛過境日數千人縣城守兵僅數十人  
惟恃民團彈壓抵禦幸未別生事端臣與知縣  
周沐潤等添募沙勇聯絡鄉團竭力攻勦於四  
月十九日經團首王元昌等率衆克復江陰縣  
城該縣城內焚掠一空迨督臣委縣丞施鏞權

知江陰甫經任事突有大股賊匪於五月十六日由常州衝出復陷江陰四出焚劫希圖東竄臣激勵民團自十七日以後無日不戰互有勝負計斃賊三千餘人我勇陣亡者亦數百人團首候補都司徐浩武生五品軍功龐希賢龐鍾祥等先後陣亡候補都司嚴康保亦因傷身故南路自常郡失守後賊連日下竄經長洲縣團

董徐佩瑗等集團抵禦先後焚燬賊船無算布  
政司理問銜馬善追賊陣亡賊又竄至金匱常  
熟交界地方經團董知縣華翼綸擊退五月十  
二日常昭團勇進攻崑山直薄城下賊兵全數  
衝出我兵旋即退回現在分遣團董督率民團  
各就水陸要害嚴密堵禦互相應援太倉業已  
收復前著藩司蔡映斗現駐城內防守而蘇州

崑山金匱毗連常熟之界水路處處可通無錫  
江陰各鄉之近常熟者賊兵日日衝突守禦尤  
難常昭彈丸之地實爲南北往來要道海口與  
通州相距僅數十里自蘇常失守以來固守二  
月有餘若非大兵速至恐裹脅愈多愈難措手  
聞曾國藩由祁門前進因道途阻隔未知行抵  
何處伏祈

皇上飭令曾國藩迅卽統師南下以拯生靈

龐鍾璐又奏言現在蘇松常鎮太四府一州俱遭蹂躪惟上海常昭尙屬完善常昭爲蘇郡後路江陰爲常郡後路與通泰僅隔一江雖地處偏隅實爲通泰外蔽設有疏虞江北亦難防範必令江北兵勇全力抵禦方免北竄之憂惟常昭之地北臨大江可通舟楫三面皆賊所環伺

東南則水路要口有十五六處西路更處處可  
通募勇不敷堵禦餉源又竭實屬萬分危急鄉  
民盼望大兵之至奚啻雲霓臣督同周沐潤等  
激勵民團附近常昭各鄉居民苦賊屠毒無不  
志切同仇雖蘇城忠逆不甚殺戮頗行小惠而  
民心不爲所愚若大兵至蘇尙需時日則賊守  
漸堅民心漸移驟難圖復伏祈

皇上迅飭督臣曾國藩統兵南下趁此民團尙固之時  
大兵雲集自可隨同助剿並據督臣函稱湖州  
紳董候補道趙景賢率勇掃蕩平望旋爲賊踞  
張玉良統二萬人以圖嘉興尙未得手臣愚以  
爲由浙至蘇必須先復吳江由滬至蘇必須先  
攻崑山由江北至蘇必須由常熟進兵如此三  
路進兵再由丹陽溧陽規復常州江陰追躡其



後庶可殲除賊匪現在招集之兵卽係潰散之  
人民團又無紀律不能遠戰必須曾國藩統師  
速到庶不至坐失機宜奏入

上命軍機大臣傳諭曾國藩曰前據曾國藩奏酌擬變  
通進兵章程當諭令飛催左宗棠等到齊由池州廣  
德分路進兵規復蘇常茲據龐鍾璐奏稱由浙至蘇  
必須先復吳江由滬至蘇必須先復崑山由江北至

蘇必須由常熟進兵似此三路進兵再由丹陽溧陽  
規復常州江陰追躡其後庶可殲除賊匪現在招集  
之兵卽係潰敗之人民團又無紀律不能遠戰請飭  
曾國藩迅速統師南下等語蘇常等郡被匪蹂躪民  
團尙能殺賊亟望官軍援剿若任久陷賊中恐民心  
易懈賊守益堅辦理愈難措手著曾國藩體察情形  
應由何路進兵迅圖規復地方並將辦理情形迅速

具奏該大臣務當統籌全局盡掃逆氛以慰朕望

同日浙江乍浦副都統錫齡阿奏言查蘇常失  
守臣卽咨商瑞昌王有齡將乍浦前調赴省官  
兵六百餘員名駐守嘉興以扼杭乍門戶尙未  
見有咨覆而嘉興已於四月二十六日失陷臣  
復飛咨瑞昌速將前調官兵全行撤回正擬會  
合張玉良兩路夾攻旋聞賊匪攻陷松江府城

之信臣分派弁兵嚴扼東犯大路並督存城兵  
丁登陴守禦頃報松江府城已於五月二十八  
日克復東路似得暫安然嘉郡逆匪知松江克  
復大兵由石門一帶攻剿勢將東竄是乍浦西  
路軍情倍緊於前設有警報臣惟有身先士卒  
竭盡血誠以期仰副

聖主軫念海疆之至意查自嘉興失守後於四月二十

八九等日有逆匪數百人自平湖海鹽閒道而  
來臣督同官兵兩路夾擊斃賊三百餘人餘俱  
撲水淹斃統計新獲逆匪及捕獲土匪共約一  
千餘名當俱訊明正法其難民萬餘酌給口糧  
截回原路奏入

上命軍機大臣傳諭瑞昌王有齡曰本日錫齡阿奏乍  
浦防剿事宜其所稱辦理防堵並擊賊情形是否屬

實著瑞昌王有齡確實查明具奏前諭瑞昌王有齡  
迅催江長貴並檄平江營等軍進扼廣德涇縣等賊  
內竄之路其嘉興郡城嚴飭張玉良迅圖克復近日  
辦理情形如何著卽行馳奏以慰廑念

初六日

戊戌

薛煥奏言查嘉定離上海計程六十

餘里中間南翔真如兩鎮爲陸路必由之道臣  
飭署守備許春和帶領松江兵三百名赴南翔

並派勇八百名赴眞如扼要屯紮互相援應許  
春和等隊甫發而南翔土匪勾結髮賊竄至該  
處許春和率隊進剿爲賊所衝奪路退回該逆  
卽於南翔西南兩路堆築土牆並招集附近土  
匪圖竄上海臣飭知縣劉郇膏勸集民團分布  
眞如江橋等處一面檄崇明營兵五百名來滬  
調遣並調吳淞營兵六百名川沙營兵三百名

分紮羅店月浦等處以固寶山門戶第南翔距  
上海僅四十里該逆垂涎已久而滬城兵力太  
單情形甚爲危迫至青浦縣城經署蘇州府吳  
雲等督帶礮船進攻斃賊數十名兵勇乘勢緣  
城賊以另股從南門繞出我軍兩而受敵隨卽  
退下俞奎等急令各船更番開礮轟擊焚燬城  
樓一處望臺一座斃賊無算逆勢始卻太倉州



城偏近嘉定崑山本派已革道員蔡映斗遊擊  
富安帶勇防守六月初六初七等日賊衆撲城  
經富安等擊退臣現飭周沐潤迅督民勇規復  
江陰一面飛飭水師各船扼堵江面以防北渡  
查江南地方糜爛不堪卽已復之區亦瘡痍徧  
地臣方圖力保上海以顧餉源而賊踞青浦嘉  
定及南翔鎮近在四十里內無兵無餉之時殊

覺無從措手臣聞曾國藩已抵祁門又聞浙省軍情緊急瑞昌何日督師起程來蘇尚未接准文報現在蘇省望兵孔亟以援師趕到之日爲士民再生之時應懇

飭下曾國藩瑞昌迅速督師兼程前來並

飭瑞昌督催張玉良趕撥勁旅三千星夜來滬聽臣調

度

薛煥又奏言金壇縣城被圍兩月有餘署江甯將軍巴棟阿屢與總兵馬子材籌商援勦馮子材以鍋帳槍礮不齊未能派撥囑臣咨請荊州將軍都興阿撥師往救臣查金壇蕞爾小邑紳民嬰城固守實屬深明大義第恐援兵遲遲不至該縣勢將不支仰懇

天恩飭催都興阿李若珠迅發援師以解倒懸奏入

上命軍機大臣傳諭薛煥曰蘇省自松江克復後餘匪復陷嘉定進踞南翔鎮招集附近土匪圖竄上海青浦縣踞城逆匪距上海密邇雖經兵練攻擊未能得手滬城兵力甚單已諭知瑞昌王有齡飭張玉良迅派勁旅三千馳赴滬上聽候薛煥調遣矣曾國藩現移營暫住祁門縣境擬俟新募楚師到齊始由徽甯進剿昨因蘇省逆匪由浙省長興孝豐一帶竄至於

潛縣境甯國郡城又有大股賊匪數萬攻圍甚急已  
諭令曾國藩派兵迎剿進解甯郡之圍此時浙省皖  
南軍情喫緊曾國藩勢難兼顧蘇省薛煥惟當俟浙  
省援師到後力圖攻克青浦嘉定二城會合民團進  
圖蘇郡並速行鼓勵常熟民團克復江陰城池以斷  
賊匪渡江北竄之路至金壇縣城被圍日久請速派  
兵援應昨因周天受奏陳金壇被圍情形已諭巴棟

阿派撥勁旅兼程前往援應矣

上又命軍機大臣傳諭瑞昌王有齡曰大江以南糜爛不堪賊踞青浦嘉定逼近上海新募之勇無多情形危急設滬城無力支持則各處民團亦必解散必得迅速派兵援應張玉良進剿嘉興帶兵二萬餘名兵力尙可分撥著瑞昌王有齡迅飭該提督挑選勁旅三千名派員管帶馳赴上海交薛煥調遣庶可節節

進剿以期收復各城於攻剿嘉興亦可收夾擊之效

初八日

庚子

巴棟阿奏言據探報句容丹陽常州

無錫蘇州各有賊匪五六千至萬餘名不等占

踞城池均有秋冬回竄之信又東壩之賊千餘

名在彼勒提卡稅金陵逆首復派賊數千名至

東陽龍潭設卡盤踞窺伺鎮城臣當嚴加準備

實力巡防惟查金壇縣城被圍日久雖軍民齊

心守禦然糧盡無援勢將決裂曾飛咨李若珠  
張玉良並馮子材商令設法接應而李若珠覆  
稱揚防兵力無多勢難抽撥張玉良能否派隊  
赴援未接文報至鎮防各軍惟向奎一營器械  
尙屬齊整其馮子材部下皆係金陵潰勇軍械  
不全力難遠顧臣已飛咨薛煥籌借鍋帳器械  
並酌備軍火米糧帶入金壇接濟一俟辦理停



當馮子材卽行拔隊起程惟賊氛徧地必先攻克丹陽始抵壇境孤軍深入必得有接應之軍庶免該逆抄我後路應請

旨飭下李若珠酌量情形分撥一軍隨帶軍火剋日渡江併力攻拔丹陽赴援壇邑並請

飭下瑞昌曾國藩迅速分道進攻從旁夾擊以分其勢庶期力解壇圍奏入

上命軍機大臣傳諭巴棟阿曰金壇被圍日久兵單糧  
缺危急萬分馮子材一軍須先將丹陽攻克始可直  
抵金壇惟孤軍深入必有援應之師方可無虞後路  
曾國藩現駐祁門到蘇尙需時日瑞昌督攻嘉興尙  
未得手均難撥兵趨救金壇已諭令李若珠酌派得  
力之兵渡江援應現在金壇情形危急著巴棟阿仍  
遵前旨卽行飭令馮子材迅速進兵並嚴飭該道府

等趕緊籌辦器械糧餉毋得遷延貽誤致失事機鎮  
城防守事宜亦應嚴加準備勿令賊匪得以窺伺句  
容丹陽常州無錫蘇州各處賊匪麇聚日久既有秋  
冬回竄之信尤應加意嚴防巴棟阿務宜督飭各軍  
聯絡師船水陸堵截毋令賊匪渡江北竄益至蔓延

欽定勦平粵匪方略卷二百四十七 庚申年

七月初九日

辛丑

瑞昌來存王有齡奏言六月十

六日賊自於潛竄陷臨安分股竄至餘杭富陽  
境內臣等調彭斯舉一軍前赴富陽防勦並調  
副將劉芳貴一軍來富協同彭斯舉勦辦又令  
副將黃金友管帶各起礮船在桐廬富陽一帶  
江面分布巡防以扼該逆東渡惟餘杭僅有知

縣蘇鏡蓉台勇千數百人兵力實形單薄省城  
又無勁旅可撥不得已飭令該縣激勵民團共  
資守禦十七日賊匪已薄餘杭城外十九日分  
股撲營我軍分路迎敵斬馘甚多忽另股繞至  
南門外放火西北兩股又復回撲我軍前後受  
敵勢遂不支勇丁傷亡過半蘇鏡蓉身受重傷  
不能入城卽於是晚回省餘杭縣城不守現惟

有先顧省城根本重地而留省兵勇不過一萬  
四千人殊有賊衆兵單之慮張玉良攻勦嘉興  
正在得手其軍斷不敢多撤閩省援兵能否前  
來尙不敢必惟派防石門兵勇四千餘人係總  
兵劉季三統帶尙可就近赴援二十日賊騎已  
由餘杭塘而來約有六七千之衆劉季三連夜  
趕回於北新關拱宸橋一帶突與賊遇奮勇迎

敵斃匪無數賊遂退出二十餘里是役也劉季  
三一戰而捷克挫其鋒然此股逆匪有七八萬  
人實係四眼狗糾集並未大受懲創臣等前請  
會國藩入徽由嚴州轉戰而東現聞該署督已  
抵祁門離浙尤近相應請

旨飭催前來大局幸甚奏入

上命軍機大臣傳諭會國藩曰前因浙省於潛竄匪有

內犯省城之勢當經諭令曾國藩由祁門取道入徽  
卽由淳安嚴州轉戰而東先除此股逆匪以保全皖  
浙大局茲據瑞昌等奏於潛大股賊匪疊陷臨安餘  
杭二縣並由餘杭塘竄偏省垣雖經總兵劉季三一  
軍擊退而省城兵勇能守而不能戰張玉良攻勦嘉  
興之軍正在得手亦難撤調福建江西之兵雖經催  
調到尙需時待援情形自屬非常緊迫著曾國藩仍



遵前旨迅速取道入徽卽由淳安嚴州轉戰而東先  
將此股逆匪撲滅保全浙省再圖規復江蘇諸郡設  
或該大臣不能親往亦須先派得力之兵前往救援  
以冀挽回大局再據王有齡奏連日探得蘇省逆賊  
紛紛北走終日水陸不絕且據團勇奪獲賊匪僞文  
內有賊目李侍賢尙在蘇城盼望其黨速往省垣之  
語蘇城賊勢單薄似乎可信著曾國藩乘此機會應

由何路進兵迅圖規復地方仍遵前旨體察情形迅速辦理

瑞昌王有齡又奏言前廣西提督張玉良向在金陵大營帶兵勦賊熟習情形江南各軍半其舊部此次進攻嘉興統兵三萬餘人本係獨當一面況疊獲勝仗功在垂成尤未便遽易生手

臣  
瑞昌奉

命總統諸軍自應出省勦辦惟宜與之賊直犯餘杭離  
省不過數十里臣等連日會商祇可先顧杭城  
所有江南軍務合無仰懇

天恩准卽以張玉良幫辦以資熟手而專責成該提督  
前經獲咎已奉

旨免其治罪正在感激圖報若責令迅拔嘉城然後乘  
勝節節進攻全局可望起色臣瑞昌俟杭屬軍

務稍定卽當前往督師會同張玉良辦理奏入  
上諭內閣曰已革廣西提督張玉良著賞還提督頂戴  
幫辦瑞昌軍務

瑞昌王有齡又奏言臣等據張玉良咨報六月初五日蘇州援賊三四萬人礮船五六十隻攻撲平望嘉興城內亦出賊數千相迎平望兵力較單以致復失副將劉仁福一軍腹背受敵亦

復退回賊股竄併嘉城初八日官軍截剿渡河  
賊匪斃賊無數初九日賊船數十隻駛至北門  
添搭浮橋竄出二萬餘人過河分撲我軍連環  
轟擊都司張萬全于海晏手刃悍賊數名參將  
曾庚福劉洪海躍馬陷陣吳再升從左包抄賊  
始驚潰同時西南兩門均出賊隊馬德昭督帶  
參將羅大春等擊退西門之賊其南門一股亦

經況文榜等擊敗賊股分竄平望張玉良以賊勢趨北督隊攻其西南初十日西門之隊力攻大橋賊卡該逆出黨迎拒況文榜等左右夾擊水師亦開礮轟擊逆勢不支棄卡而逃白明玉等帶隊直逼賊壘馬德昭等以火器圍攻連斃指揮賊目數名安勇楊得勝首先登牆各軍相繼而上匪衆卽時遁走連破賊壘三座淹斃殺

斃之賊甚多其南門五龍橋卡經各軍繞越桑林前後夾攻該逆首尾不能兼顧越卡而走是日之戰共計攻破賊壘七座二十三等日兩次攻城亦均獲勝所惜者平望再失仍與蘇州一氣相通未能絕其外援奏入報

聞

初十日

壬寅

李若珠奏言據探天長踞賊急思外

竄六合之賊亦聞在陳家集一帶竊伺逆首陳  
玉城現在蘇常等處製造長龍戰船下欲偷渡  
通泰上欲糾連天六一屆新秋該逆必當復竄  
瓜揚擄取糧食當派副都統海全等各帶所部  
兵勇前往天六要隘巡防抄擊至沿江艇師大  
小一百餘號均係按段駐紮分派已定各有責  
成昨以江陰復陷又添派總兵曾秉忠管駕長



龍船一百號全數入江上下梭巡往來策應不論何處緊急皆應飛速援剿現准薛煥咨調三十隻前往上海助剿刻下各處艇師仍形單薄臣恐稍有疏虞擬俟揚防水勢稍平布置嚴定卽當乘船親巡江面察看水師務求實濟上游吳全美艇船儻能乘此東下則下可以保全裏下河門戶上可以接應楊載福水師奏入報

聞

十二日

甲辰

薛煥奏言青浦之賊壘被兵團會攻

勢將不支詎該逆潛赴崑山蘇州糾集大股賊  
援屬聚青浦我軍甫將礮臺築就該逆忽駛出  
逆船三四百號水陸兩路圍裏我軍賊衆我寡  
遂至失利礮臺被陷失去礮船二十六隻官軍  
挫退賊遂直撲松江都司陳金堂在廣富林帶

兵二百名駐守旋亦潰退六月二十六日賊犯

郡城守城兵勇本少四面城垣不能兼顧賊由

南門及西門水柵衝入遂致失守臣兩月以來

募調兵勇統計不滿四千而分調防剿爲數更

屬無幾前咨張玉良撥兵三千並調曾秉忠長

龍船三十隻來滬助剿至今未到茲松江復失

與青浦以上逆氛聯爲一片南翔鎮仍爲賊踞

嘉定之賊又分股竄至羅店勢將撲犯寶山土  
海則三面皆賊偏近兇鋒其餘川沙南匯奉賢  
各廳縣在在瀕危且賊擄船隻已多水陸皆可  
竄越當此兵缺餉匱竭蹶從事勢處萬難溷城  
關繫餉源賊所注意惟有督率文武極力守禦  
以保要區臣督辦防剿未有統兵大員水陸各  
軍均無表率應懇

飭令瑞昌王有齡張玉良等於彭斯舉吳再升饒廷選  
馬德昭四員中酌派一員統帶精銳四五百人  
來滬卽將臣現在調募之水陸各軍統歸節制  
以一號令而重事權奏入

上命軍機大臣傳諭薛煥曰逆匪潛赴崑山蘇州糾約  
大股麇聚青浦攻陷礮臺遂於二十六日復將松江  
府城攻陷上海三面皆賊逼近兇鋒前飭瑞昌派兵

赴援諒可卽日趕到本日復諭令曾國藩趕緊援剿  
並催令瑞昌等於馬德昭饒廷選吳再升彭斯舉四  
員中酌派一員統帶精兵四五百人前赴上海援應  
著薛煥迅速迎提一面飭催曾秉忠長龍船赴滬助  
剿一面督率員弁竭力固守以待援兵

上又命軍機大臣傳諭曾國藩瑞昌王有齡曰前因蘇  
常等處失守當諭瑞昌王有齡將所調彭斯舉吳再

升饒廷選各軍赴蘇救援茲據薛煥奏稱青浦官軍  
失利松江府城復陷上海情形危迫請飭督師大臣  
兼程救援松江復失與青浦以上逆氛聯爲一片嘉  
定之賊分竄羅店地方勢將撲犯寶山上海爲餉源  
所繫賊所注意現在三面皆賊存城兵勇無多實屬  
萬分危迫前諭曾國藩自嚴州轉戰而東目下將弁  
兵勇是否調齊當此事機緊迫之餘該大臣務當設

法探明道路兼程前進急攻蘇松各城使該逆回兵  
救援以解上海之危瑞昌因宜興之賊直犯餘杭偏  
近省城未能前進現在滬城危急著該將軍卽於馬  
德昭彭斯舉吳再升饒廷選四員中酌派一人統帶  
精銳四五百人前往救應營中如尙有廣勇毋庸派  
往並飭帶兵之員不得遷延觀望致誤事機本日復  
據張芾奏賊圍甯國愈聚愈衆周天受激勵飢軍誓



以死守無從乞援情形亦甚緊迫前經諭令曾國藩  
調派勁旅聞道前往應援著仍遵前旨分撥兵勇派  
委得力將弁迅速統帶前往以解甯國之圍

同日張芾奏言逆匪圍逼甯國郡城偵知城中  
軍疲餉盡增築逆壘並率騎隊由西而北將偃  
北門圖斷餉道米興朝師次誓節渡甯離廣德  
五十里卽頓兵不進周天受知外援不至泣誓

三軍願以死守一襲賊營再毀賊卡兵心愈奮  
六月二十三日賊衆五六千直薄城北分撲各  
營壓城而陣參將馮開得都司陳錫祺等憑營  
抵禦周天受選精銳之士下城夾擊遊擊曾得  
勝緣山抄出賊後賊始奪路返奔參將林保向  
元吉等率所部來會周天受揮軍乘勝攻襲賊  
巢而賊乃拒守益堅臣查甯郡一城衆賊環伺

我軍因守二十餘日縱屢戰輒勝而勢仍不支  
曾國藩近在祁門兵雖盈萬以鎮將未齊勢難  
取道石埭太平成師以出若臣之部卒總計有  
一萬數千而控貴池禦青陽攻涇縣並備浙西  
回竄之賊分紮嶺隘不下數十處副將余永椿  
駐軍太平王夢麟駐軍旌德設防籌餉轉戰不  
息賊方由三溪蠡嶺駁駁內伺略一抽調賊必

蹈隙而來是甯圍未解先棄徽防日夜焦思旁  
皇無措所幸江長貴顧全大局以米興朝師行  
十日未出百里恐誤事機催令江長泰所帶三  
百人會合臣所派守備倪開試羅籽高等四百  
人於二十四日繞道入城仍催黃占超一軍星  
速繼進藉以稍資臂助現准王有齡報撥甯餉  
一萬兩解徽俟此項餉銀抵徽後卽當加派弁

兵探路解往或冀稍固軍心以挽危機於萬一  
奏入

上命軍機大臣傳諭張芾曰甯國府城困守二十餘日  
雖屢戰輒勝恐兵疲餉竭久將不支各路官軍自應  
趕緊赴援雖據奏稱江長貴已催令江長泰所帶三  
百人會合張芾所派守備倪開試等四百人繞道入  
城兵力尙形單薄曾國藩近在祁門前已有諭旨令

調派勁旅開道前往甯國與周天受內外夾擊以解  
城圍本日復諭迅撥兵勇就近赴援其浙江報撥甯  
餉到徽卽著張芾加派弁兵妥速轉解前往以固軍  
心所稱賊倡甯國北門意將斷我糧道米興朝甫離  
廣德五十里卽頓兵不進師行十日未出百里似此  
恇怯無能自應嚴行指劾並著張芾速將該革鎮逗  
留各情據實嚴參毋稍客隱

十四日丙午喬松年奏言金壇被圍日久守將艾

得勝本係健將知縣李淮人亦耐勞能事力守  
孤城洵堪嘉尚應懇

天恩飭令巴棟阿查明先行奏請優獎以示鼓勵昨聞  
鎮江有橋頭炭渚之捷然與其進剿高資不如  
往援金壇尤關緊要至江陰雖爲賊踞而民團  
未散尙能擊賊臣夙知有候選訓導余治公正

廉潔爲江陰鄉民所推服現已派令前往密爲  
勸導不令渙散奏入

上命軍機大臣傳諭巴棟阿曰金壇文武力守孤城數  
月之久深堪嘉尙參將艾得勝知縣李淮著巴棟阿  
先行查明奏請優獎其隨同守城出力之官紳兵勇  
一併查明先行奏請優獎至金壇孤城被圍日久望  
援甚切前已諭令巴棟阿迅飭馮子材帶兵往援並



諭李若珠派兵援應後路著卽飛飭該總兵星速前進毋得稽遲逗留致干重咎

十五日

丁未

曾國藩奏言

臣自行抵祁門後王有

齡催

臣

赴浙瑞昌催

臣

由浙赴嘉興而甯國被

圍緊急張芾屢函屬

臣

撥兵赴援

臣以所部萬

人皆係新募之卒未經見仗不敢輕於一試又以鮑超爲水所阻尙未旋鄂朱品隆患病未痊

不能帶隊張運蘭雖入江西境內毓科咨留袁  
州以防南贛之賊臣以不援則甯國有坐困之  
勢赴援則統將無可派之人正在萬分焦灼忽  
於六月二十九日接到瑞昌咨稱賊偏杭城當  
經調集各軍奮力擊退奸匪供稱賊股回竄徽  
甯又接張芾函開甯國亦獲勝仗協餉已於二  
十四日送入府城臣前奏八月進剿欽奉

恩旨俞允今浙江偏城之賊業經擊退若鮑超等陸續  
到齊甯國保全無恙當可與初次原奏相符至  
進兵之路凡浙中來信皆勸臣先赴杭州注重  
嘉興凡江北來信皆勸臣先攻池州注重蕪湖  
欽奉

諭旨飭臣斟酌辦理以臣愚見由杭嘉以至蘇州處處  
阻水兵從一路而入必難得手目下張玉良三

萬餘人頓兵一面已屬失勢若臣與瑞昌再以重兵繼之愈覺窘束而不能施展不特進攻蘇州毫無把握也不若待兵將調齊察賊勢最重之處疾趨而痛剿之至

諭旨垂詢徽甯軍務能否兼顧一節臣入徽境已逾半月留心察訪張芾自咸豐五年籌辦徽池防務屢挫賊鋒使不至深入浙境於大局不爲無益

惟所部各軍紀律太寬近日多住民房攜帶婦女張芾於各嶺設卡之處並未親出查閱一次卽徽州城守之具亦無豫備觀其軍心之懈實已難期再振周天受向以能戰著名本年二月不能扼守廣德致有杭州之變三月不能扼守建平致有東場之失徽甯兩防歷年取用浙餉約計千餘萬浙中恃爲長城故本省別無防守

之師一旦藩籬盡撤任賊長驅杭人慘遭浩劫  
百物蕩盡以故浙江官紳士民莫不痛恨周天  
受貽誤大局而張芾有督辦之責亦當分任其  
過

諭旨以賊匪入浙張芾咎無可辭臣固不敢爲之寬解  
也臣與張芾在京素識近來同歷戎行書問常  
通稔知該員學養深沈操行廉正尙爲老成宿

望惟治兵非其所長用人或受朦蔽應如何估  
置得宜之處

聖主自有權衡非臣下所敢妄擬已革提督周天受賂  
誤浙省情罪較重惟從前打仗出力現在甯郡  
被圍尙能督率將士忍飢困守其胞弟周天培  
亦以忠勳殉難可否將周天受仍留臣營差遣  
以觀後效出自

聖主鴻裁至徽甯池太等府處處與江浙毗連地方遼闊袤延七百里一片逆氛幾無尺寸完區臣軍調募齊備人數不滿三萬正當狂寇壓境之時不敢自信調度得宜漸有起色惟係臣兼轄地方且目下駐師將來進兵皆不離乎皖南自應力籌兼顧責無旁貸特是徽甯兩防兵數尙衆錮習已深舊欠過多新餉尤缺不裁汰則口食



無資一裁汰則變態百出辦理棘手一言難罄  
臣才力短絀深恐弗勝如幸

旨歸併臣處督辦臣兼顧皖南卽斷不能更顧浙江奏

八

上命軍機大臣傳諭瑞昌王有齡張玉良曰現因張芾  
督辦軍務不能得力已令其來京所有皖南軍務並  
歸曾國藩督辦矣該大臣旣顧皖南卽不能兼顧浙

江浙省現在兵勇已有五六萬人前撲省垣之賊業經擊退卽著瑞昌等迅就現有兵力飭令帶兵各員分途勦辦張玉良向稱驍勇善戰並著該提督剋期攻復嘉興進規蘇郡毋得藉口待援遷延不進現在松江復失滬城危急前諭該將軍等於馬德昭等四員中酌派一員統帶四五千人員前往救應並著迅速派往毋稍遲緩俟上海得手卽可會合浙師兩路進

兵蘇城不難克復也

上諭內閣曰張芾著卽來京所有皖南軍務統歸曾國藩督辦周天受著交曾國藩差委

同日劉長佑奏言逆匪石達開上年自桂林潰竄後屬聚慶遠分陷各屬本年正月分股趨犯南甯思恩兩府屬竄至百色廳二月十四日分遣逆黨數萬直撲百色廳城總兵富順等激勵

兵練悉力固守連挫賊鋒該逆兩次用地雷轟  
塌城垣十餘丈城內濠深柵密兵練復奮力迎  
拒賊不得入十五日兵勇出戰連焚賊壘十數  
座該匪敗潰死者不可勝計十六日逆黨石鎮  
常逃至塘茶村經團總李汝昭斃之石鎮吉黃  
潰生折回慶遠路過安定亦經該土司擒獲石  
達開之弟石達德先亦爲思恩府擒斬僞宰制

曾廣依等復率衆數萬闌入泗城遂自泗城走  
西林西隆一帶四月初七日紮筏偷渡紅水江  
竄赴貴州興義府地界復撲雲南廣南府城查  
石逆詭譎異常經過之處必分數路每路復分  
爲數起使官軍力不及防此次曾廣依入黔後  
石逆尙踞慶遠逆黨賴蘊新等陷河池思恩各  
州縣力撲南丹土州欲由此分道入黔經該土

知州莫樹棠等集團堵截斃匪不下數千該逆  
勢不能支乃折回慶遠石逆遂率而南蓋欲繞  
道思恩出泗城尋會廣依原路趨黔以窺蜀也  
請

旨飭下四川雲貴各督撫臣遴派勁旅沿邊控制夾擊  
以杜續竄其前自羅融竄入永甯州境股匪查  
係石逆後旗部衆內亂殺其宰制余忠扶遂背

石逆東走欲取道折回江西號稱數萬臣派革職副將謝永祐等於六月十五六等日連敗賊於瓦窰該匪乘夜徑走懷遠所屬小龍勝一帶臣已飭副將鄢世堂等各率楚勇前往追截臣查僞國宗石鎮吉自八年在福建與石逆分股竄陷廣東湖南沿邊各州縣至桂林始興與石逆會合在賊中最爲獷悍石鎮常石達德皆該

逆親信子弟兇惡異常均以次就戮足褫賊膽  
而振軍威此次在事文武官紳均屬著有勞績  
容臣擇尤彙入克復慶遠案內酌量保獎以勵  
將來奏入

上命軍機大臣傳諭張亮基崇實劉源灝田興恕曰石  
逆詭譎異常凡經過之處必分其黨爲數路每路復  
分爲數起使官軍不暇兼顧得以肆行奔突若非合



力耗勦不免有過此竄彼之虞著張亮基劉源灝田  
興恕激勵各軍將竄入黔滇各股會合粵省兵勇悉  
數殲除勿留餘孽並著遴選勁旅於沿邊一帶地方  
實力截擊毋令餘匪竄入其四川西秀敘永一帶尤  
爲黔滇入蜀要隘卽著崇實嚴飭防勦各軍認真巡  
探如有該逆股匪竄近川境之信立卽派撥兵勇認  
眞堵剿毋使擾及完善之區

上諭內閣曰官軍攻勦百色等處逆匪獲勝勦辦尙爲得手仍著該撫督飭各軍跟蹤追勦務絕根株所有在事出力之文武官紳著准其彙入克復慶遠案內保奏候朕施恩

十六日

戊申

毓科奏言據探浙江嘉興府被賊竄

踞經提督張玉良率師進攻屢獲勝仗方期指日收復詎意另股悍賊由宜興閒道入浙盤踞

於潛繞越臨安竄入餘杭圖撲杭省軍情萬分  
緊急江西與浙脣齒相依亟宜派撥兵勇馳往  
救援無如南贛吉安等府屬界連粵楚現值樂  
昌桂陽一帶賊匪勢甚猖獗意在先犯江境會  
合浙皖糜爛東南若遂奸謀將來愈難措手以  
目下情形而論江右實當其衝各屬隘口紛歧  
不能不調集重兵扼要嚴防此時亟圖分兵援

浙實屬無可抽調因思前次奏明派往援蘇之副將文瑞劉芳貴統帶各軍共計三千八百數十餘人已抵浙境自應先其所急飭令就近援杭俟浙省軍務稍緩再行攻剿蘇常如此轉移似於江浙兩省均有裨益並請

旨飭下閩浙督臣速派勁旅一體赴援以全大局奏入上命軍機大臣傳諭慶端瑞瓊曰毓科奏逆匪由宜興

閒道入浙疊陷於潛臨安竄入餘杭直撲省垣現催副將文瑞等就近赴援並請飭閩省派兵援救前因於潛逆匪竄偏省垣雖經總兵劉季三擊退而省城兵勇能守而不能戰曾諭曾國藩迅速赴援昨據該大臣奏稱兼顧皖南不能再顧浙江是浙省援應之師惟有福建江西尙可就近助剿前據慶端先後派令署總兵繼興等統帶兵勇援浙現在尙有千名未

到著慶端瑞瓚迅卽催令赴浙聽候瑞昌王有齡調遣毋得再有遷延並著隨時偵探浙江情形如兵力尙屬不敷卽著續行添調派往援應毋誤事機

十八日

庚戌

薛煥奏言自蘇城失陷逆勢蔓延青

浦官軍失利松江復陷該逆窺伺上海正在設法前往堵剿該逆於六月三十日攻竄泗涇鎮該鎮圍丁全行潰散該逆遂擾及七堡蟠龍虹

橋法華等鎮到處焚掠臣卽於是夜率同司道將領星夜上城嚴密布置初二日辰刻直撲羅家灣營盤賊衆我寡兵勇卽時潰散該逆遂分西南兩路徑撲上海西南兩門臣雖豫爲準備而兵勇無多不能出城兜勦祇得嬰城固守臣與署臬司江清驥守西門兼署藩司署蘇松太道吳煦守大南門上海縣知縣劉卹膏守小南

門海防同知嚴錫康守大小東門北門尙不喫  
重城外直接四明公所尙有甯波兵勇可恃臣  
已派參將唐國棟帶兵防守當賊之撲西門也  
冒稱官兵退回欲濶入城我軍察知其僞閉城  
守禦俟其逼近城垣槍礮齊施斃逆匪數十名  
賊蹤稍卻維時大南門之賊彙擁逼近吳煦等  
亦如臣守西門法斃賊百餘名自午至申三時



之久賊始退卻我軍大開西門奮力追殺殲斃  
無算時近昏黑不能窮追始行收隊卽據吳煦  
面稟我軍交戰時該逆在城外大小東門焚燒  
民房捐釐各局亦被搶掠初三日該逆又勾結  
閩廣匪徒搶掠江海關縱火焚燒經同知嚴錫  
康開礮擊退又在大小南門外屋上窺探虛實  
大股麇至復經吳煦等轟斃不計其數該逆分

股復竄西門不敢近偏時在離城二三里許晝  
夜往來不絕東南兩門近城民屋現爲賊踞臣  
苦無勁旅不能出城攻勦僅恃在城文武齊心  
協力固守待援實有岌岌不可終日之勢上海  
爲江南餉源所自出關係甚大現當蘇垣未復  
僅留此一綫生機藉以恢復全省儻久無援應  
力不能支局勢何堪設想惟有籲懇

天恩飛飭新任兩江督臣曾國藩通籌大局急顧餉源  
以維根本迅速來蘇相機擇要進剿並請

旨飭下江南總統瑞昌總兵曾秉忠飛速馳救上海以  
解城圍

薛煥又奏言江南數十州縣被蹂躪者十居七  
八實屬滋蔓難圖惟有以重兵直擣金陵該逆  
必收枝葉之蔓延以顧根本查咸豐三年金陵

失守賊卽竄陷鎮江其勢將不旋踵而至蘇常  
前大臣向榮以全軍攻金陵賊卽不敢遠竄而  
蘇常遂得享數年安全之福此其明效大驗也  
爲今之計若金陵得以牽制賊勢嘉興本有重  
兵一面以勁旅由浙江之嘉善直達松江得與  
臣會合迅掃青浦嘉定二處脅從者衆一聞大  
兵雲集定見從順如歸松太兩屬先可安枕次

第規取蘇常不難矣奏入

上命軍機大臣傳諭曾國藩瑞昌王有齡張玉良曰本日據薛煥奏逆衆圍撲上海縣城勢甚猖獗現在登陴固守並催調各路援兵迅速馳救上海爲江南餉源所自出關係甚大該逆於六月三十等日竄泗涇鎮等處分路徑撲西南兩門並在大小東門焚燒民房捐釐各局及江海關均被搶掠占踞近城民屋薛

煥以兵勇無多不能出城攻勦祇可嬰城固守專待  
援兵勢甚危迫現在蘇省未復僅恃此一綫餉源爲  
次第規取蘇常之計亟應調集援師力保江南餉源  
重地曾國藩現駐祁門相距較遠兵將均尙未齊誠  
恐緩不濟急著瑞昌王有齡張玉良迅速於馬德昭  
等四員中酌派一員帶領精銳四五千入星夜起程  
前赴上海竭力救援以拯目前危急並再續派援兵

以資策應毋得稍有遲延致誤事機再據薛煥奏江南賊匪滋蔓難圖惟有以重兵直擣金陵該逆必回顧根本從前向榮以全軍攻金陵蘇常得享安全此其明效浙省嘉興本有重兵一面以勁旅由嘉善直達松江與該署撫會合迅掃青浦嘉定該處脅從者衆定見從順如歸等語並著瑞昌飭令所派援兵卽由嘉善一路前進會同勦辦

上又命軍機大臣傳諭李若珠曰逆匪大股困偏上海  
經薛煥督飭在城文武登陴固守轟斃賊匪多名惟  
城內兵勇無多不能出城攻剿兇醜正張勢甚危急  
上海爲江南餉源所自出關繫重大現在蘇常未復  
前經該署督檄調會秉忠管帶長龍船赴援至今未  
到著李若珠迅卽飭催該總兵統帶長龍等船駛赴  
上海力解城圍以保全大江南北餉道無稍遲誤前



有旨令該提督於水師鎮將中酌保一員統帶各起  
師船尙未覆奏著卽迅速奏保聽候簡派

同日劉源灝奏言粵匪石達開分股竄擾黔境  
田興恕駐軍之處距遵義僅十餘站由遵義至  
大定僅三百餘里均十數日可到若由西陽秀  
山繞道入川再由綦江敘永分趨大定遵義紆  
迴周折必須五六十日始能到黔現在竄黔粵

匪其由龍里下竄一股疊被兵練鄉團隨處剿  
擊業由羊場逃往都勻府麻哈州所屬之谷蒙  
大江一帶至由羅斛奔竄一股復由長寨驢繞  
道竄往歸化廳附近之板當地方與盤踞該廳  
之賊互爲犄角歸化至遵義大定不能越耶岱  
安順安平清鎮黔西而過耶岱廳爲滇黔往來  
通衢非但並未失守且無粵匪擾及各股賊匪

亦無石達開在內該逆之本意原欲假道入川  
因被黔中節節堵剿始不至闖入川境此時粵  
氛距川既遠則川邊情形尙緩黔中與賊相持  
自較川省爲急田興恕奉

旨來黔原係督辦貴州軍務兼防粵逆今黔匪尙未掃  
平粵逆又復竄擾非先保黔境斷難顧及川邊  
使田興恕原在川省移緩就急尙須過黔堵剿

今既督師在黔正宜就近馳赴歸化一帶趕緊  
勦辦以期及早殲除若先赴川境再入黔疆不  
免稽延時日臣通盤籌畫田興恕自應督大隊  
由石阡取道遵義力圖勦辦使粵匪剋期掃滅  
黔中既得安全則川邊更可無慮也奏入

上命軍機大臣傳諭劉源灝田興恕曰現在粵氛既距  
川尚遠川疆稍鬆黔中與賊相持正當喫緊之際田

興恕自應取道遵義力圖剿辦著卽探明省垣如可  
毋庸赴援卽可先辦粵匪務須迎頭截剿毋庸繞道  
入川

十九日辛亥李若珠奏言據靖江縣知縣齊在鎔  
等稟稱六月二十五日逆首僞丞相方得勝糾  
合賊衆一千餘人在江陰之申港地方築壘並  
搶獲河內船隻欲由申港偷渡四墩子該處江

面稍窄卽係北岸靖江地面當派董事劉學岡  
調集巡船會同遊擊郭定猷艇師並知照曾秉  
忠長龍船上下策應於是夜寅刻駛抵該港一  
擁登岸直抵賊巢該逆讎擁出拒我軍且卻且  
前誘賊追至江邊劉學岡等迎頭截擊左右兩  
軍抄入賊後縱火燒燬申港賊壘二座賊衆不  
及歸營紛紛逃竄投港淹斃者不計其數我軍

堯益淨盡洵足以寒賊膽而快人心所有江陰  
靖江在事出力文武紳董團練仰懇

天恩給予獎勵卽由臣會同漕臣王夢齡查明酌擬彙  
奏以昭激勸奏入

上諭曰江靖兩縣出力紳團先行擇尤保奏數人餘著  
暫行存記

李若珠又奏言臣思南北口岸叢雜該逆出沒

無定所有艇船駐紮地方尤須分布得宜查有  
浙江黃巖鎮總兵黃彬管駕艇船勞績久著最  
得兵心仰懇

天恩將該總兵黃彬

賞加提督銜卽令統帶各起師船如有不遵調遣者並  
准其據實稟明仍由臣奏叅以一事權而重江  
岸奏入



上諭內閣曰浙江黃巖鎮總兵黃彬著賞加提督銜所  
有鎮揚一帶上下游各起師船均歸統帶以專責成